
Saksnr: 2021/6180-1
Saksbehandlar: Ingebjørg Erikstad

Saksgang

Utval	Utv.saksnr.	Møtedato
Hovudutval for kultur, idrett og integrering		25.03.2021

Delegering frå hovudutval for kultur, idrett og integrering til administrasjonen

Forslag til vedtak

1. Hovudutval for kultur, idrett og integrering delegerer mynde til å gje uttale om regionale interesser i kommunale planer som ikkje er heimla i plan- og bygningslova til fylkesrådmannen.
2. Hovudutval for kultur, idrett og integrering meiner at sektoren har eit stort tal tilskotsordningar, og ber fylkesrådmannen, i samband med budsjettarbeidet for 2022, vurdere om det kan vere føremålstenleg å slå saman nærskyldte ordningar. Ein vidaredelegerer ikkje mynde til fylkesrådmannen i saker som gjeld tilskotsforvaltning no.

Samandrag

Hovudutval for kultur, idrett og integrering har bedt om at det vert sett nærare på den heilskaplege saksmengda i utvalet, og vurdere om nokre saker kan vidaredelegerast til fylkesrådmannen å ta stilling til.

«Reglement for folkevalde organ og delegering» fastset den interne arbeidsdelinga mellom politiske organ, og mellom politisk og administrativ side i Vestland fylkeskommune.

Ut frå ein gjennomgang av kva saker hovudutvalet har fått delegert avgjerdsmynde i, meiner fylkesdirektøren at det er to sakstyper der vidaredelegering kan gjerast. Det er uttale til kommunale planer som ikkje er heimla i plan og bygningslova, og i tilskotssaker.

I sakavert det argumentert for å vidaredelegere mynde til fylkesrådmannen til å gje uttale til kommunale planer som ikkje er heimla i plan og bygningslova, og at det ikkje vert vidaredelegert mynde til å gjere vedtak i tilskotssaker no.

Per Morten Ekerhovd
fylkesdirektør

Ingebjørg Erikstad
konst seksjonssjef

Saksframlegget er godkjent elektronisk og har difor inga handskriven underskrift

Saksutgreiing

1. Bakgrunn for saka

I PS 12/2021 fatta hovudutval for kultur, idrett og integrering følgjande vedtak 13.01.2021:

Vedtak

1. Det vert haldt eit møte i hovudutval for kultur, idrett og integrering 14. juni 2021.

2. Hovudutval for kultur, idrett og integrering ber administrasjonen til neste møte sjå på den heilskaplege saksmengda i hovudutvalet og om nokre saker kan delegerast frå politisk handsaming til administrasjonen.

Hovudutvalet fatta 13.02.2020 følgjande vedtak i PS 21/2020:

Vedtak

Hovudutvalet ber administrasjonen om ei sak med ein samla gjennomgang av tilskotsordningane på utvalet sitt område, med sikte på mogleg forenkling, samordning og tydelegare samanheng mellom tilskotsordningane og overordna politiske mål og strategiar for Vestland fylkeskommune.

Hovudutvalet fatta 15.10.2020 følgjande vedtak i PS 142/2020:

Vedtak

Fylkesdirektør leggjer fram sak til utvalet kor det kjem fram kven som får driftstilskot under sektorbudsjett kultur, idrett og inkludering.

Utvalet ber fylkesdirektøren å få fram følgjande om tilskotsmottakarane:

- Sum på tilskot frå Vestland fylkeskommune.
- Eventuell fordelingsnøkkel (med summer) mellom kommune, fylke og stat.
- Eventuelt formål med driftstilskotet.
- Administrasjonen si vurdering av verknaden av tilskotet.
- Eventuell annan relevant informasjon. Formålet med gjennomgangen er å få ei oversikt over tilskotsmottakarane som informasjon for vidare arbeid i utvalet.

Vedtaket i PS 142/2020 vart svart ut gjennom RS 113/2020 i møte 25.11.2020. I same møte vart også gitt uttale til budsjett 2021/økonomiplan 2021-2024, jf PS 155/2020.

Denne saka no er ei oppfølging av pkt 2 i vedtaket frå 13.01.2021. Saka vil også svare på utfordringar i vedtaket av 13.02.2020.

2. Vedtakskompetanse:

Av kommunelova § 13-1 (6) følgjer at «Et folkevalgt organ kan gi kommunedirektøren myndighet til å treffe vedtak i saker som ikke har prinsipiell betydning, hvis ikke kommunestyret eller fylkestinget selv har bestemt noe annet.»

Med bakgrunn i kommunelova sine føringar, kan hovudutval for kultur, idrett og integrering innan sitt saksområde vidaredelegere mynde frå hovudutvalet til fylkesrådmannen å avgjere saker av ikkje-prinsipiell karakter.

3. Vurderingar og verknader:

3.1 Delegeringsreglementet:

Den interne arbeidsdelinga mellom politiske organ, og mellom politisk og administrativ side i Vestland fylkeskommune er fastsett i «Reglement for folkevalde organ og delegering», sist handsama i fylkestinget i september 2020; PS 111/2020.

Fylkesdirektøren tolkar vedtaket slik at det i dette tilfelle er ønskje om å sjå på om nokre av hovudutvalet sine oppgåver/saker kan vidaredelegerast til administrativt nivå, dvs til fylkesrådmannen. .

I reglement for hovudutval for kultur, idrett og friluftsliv er det særleg tre punkt å merke seg. Det er kva oppgåver hovudutvalet skal arbeide med, kva saker utvalet har avgjerdsmynde i, og kva saker utvalet gjev tilråding i.

A) Oppgåver som utvalet skal arbeide med, er skildra slik i pkt 2 i reglementet:

- arkiv
- bibliotek
- fysisk aktivitet, idrett og friluftsliv
- inkludering og mangfald
- kulturarv og kulturminne
- kulturformidling
- kunst- og kulturutvikling
- anleggsutvikling og fordeling av spelemidler til kulturbygg og anlegg for fysisk aktivitet
- profesjonelt kulturliv, frivillig sektor, born og unge
- andre relevante oppgaver innafor saksområdet og aktuelle kulturpolitiske spørsmål

Det er vidare sagt at utvalet, innanfor fylkeskommunen si eiga verksemd, og på grunnlag av regionalpolitiske prioriteringar, særskilt skal arbeide med:

- utforming av mål for verksemda og prioriteringar for tenestetilbodet sett i høve til økonomiske føresetnader og kvalitetskrav
- retningslinjer for tenestetilbodet og drifta
- økonomiplan/årsbudsjett
- endring av budsjetttrammer
- resultatvurdering

B) Saker der utvalet har avgjerdsmynde, jf pkt 3 i reglementet:

- sjå Reglement for økonomiforvaltninga punkt 3.2
- fordeling av statlege tilskot og stønadsordningar som fylkeskommunen er sett til å ivareta innanfor sitt arbeidsområde
- fordeling av fylkeskommunale tilskots- og stønadsordningar innanfor sitt arbeidsområde
- saker etter fullmakt fastsett i Reglement for delegering etter særlov
- saker som overordna organ delegerer til utvalet
- tildeling av fylkeskommunale prisar relatert til saksområdet
- årleg rapport om gjennomføring av planar innan eige ansvarsområde
- innan sitt saksområde gje uttale om regionale interesser i kommunale planar som ikkje er heimla i plan- og bygningslova

C) Utvalet skal gje tilråding i følgjande saker, jf pkt 4 i reglementet:

- framlegg til årsbudsjett, økonomiplan og andre planer innanfor utvalet sitt arbeidsområde.
- saker der fylkesutvalet tek avgjerd etter innstilling frå hovudutvala i samsvar med Reglement for delegering etter særlov
- gje innstilling om vedtak av planprogram innan sitt ansvarsområde
- ivareta fagansvaret og følgje opp planar innan sitt ansvarsområde
- gje innstilling om høyringsforslag og endeleg plan innan eige ansvarsområde
- gje innstilling om revidert handlingsprogram innan eige ansvarsområde
- ansvaret for å ivareta regionale planar i kommunale arealplanar

Reglementet har også eit eige punkt om fråsegner, jf reglementet pkt 7.

Når det gjeld saker der utvalet skal gi tilråding, jf pkt C) over, er dette å sjå på som prinsipielle og overordna. Desse oppgåvene er ikkje grunnlag for nærare vurderingar i høve ev delegering i denne samanheng.

For å vurdere ev delegering frå hovudutvalet til fylkesrådmannen, vil det vere saker under punktet «Saker der utvalet har avgjerdsmynde» vi må sjå til, jf pkt B) over, og drøfte. Desse kan vi også sjå som ei konkretisering av oppgåver omtalt i del to i pkt A) over. Også oppgåva med fråsegner vert drøfta.

Fylkesdirektøren minner om det som står i innleiingsvis i delegeringsreglementet, nemleg at:

«All delegert mynde skal nyttast i samsvar med reglar om saksbehandling som følgjer av lover, forskrifter og god forvaltningsskikk, og må ligge innanfor planar og budsjetttrammer som er vedtekte av fylkestinget eller anna fylkeskommunalt organ.

Fylkesrådmannen kan ikkje treffe vedtak i saker som har prinsipiell betydning, jf kommunelova § 13-1 (6).»

Dette betyr at saker av prinsipiell karakter ikkje kan vidaredelegerast til fylkesrådmannen. Og der det ev vert vidaredelegert mynde, gjeld sjølvstøtt dei same reglane om forsvarleg sakshandsaming.

3.2 Saker der hovudutvalet har avgjerdsmynde, jf pkt 3 i reglementet:

3.2.1 Budsjettendringar

Første kulepunkt handlar om mynde til innan sitt budsjett- og ansvarsområde å gjere endringar i og mellom løvingsnivåa i driftsbudsjettet slik det går fram av budsjettreglement og dei årlege budsjettvedtaka. Vedteke budsjett er i høgste grad eit politisk dokument, og ev behov for justeringar gjennom året bør også vere gjenstand for politiske vurderingar, ikkje minst om dette er justeringar som vil ha konsekvensar utover inneverande budsjettår. Endringar i budsjett kan knytast til dei to årlege tertialrapportane. Utover dette ser ikkje fylkesdirektøren at det skal vere behov for denne typen saker, med mindre det skulle oppstå heilt spesielle hastesituasjonar. Fylkesdirektøren kan ikkje heilt sjå føre seg kva type situasjon dette skulle vere, men vurderer likevel ikkje denne typen saker som eigna for vidaredelegering til fylkesrådmannen.

3.2.2 Tilskot

Fleire av kulepunkt handlar om tilskot; både statlege ordningar som fylkeskommunen forvaltar, og eigne fylkeskommunale ordningar. Hovudutvalet har m.a. i sitt vedtak av 13.02.2020 utfordra på forenkling, samordning og tydelegare samanheng mellom tilskotsordningane og politiske mål og strategiar i Vestland fylkeskommune.

Pr idag har hovudutvalet 47 søkbare ordningar (jf VLFK si heimeside medio mars 2021).

Tilskotsordningane fordeler seg slik:

- Bibliotekutvikling 5 ordningar
- Idrett og friluftsliv 12 ordningar
- Integrering og inkludering 3 ordningar
- Kunst og kulturutvikling 12 ordningar
- Kulturformidling 2 ordningar
- Kulturarv 13 ordningar

Dagens tilskotsregime er etablert for å fylle opp mål og strategiar i dei to gjeldande regionale kulturplanane som i 2023 vert avløyst av ny regional plan for Vestland. I tillegg gir vedteken utviklingsplan for Vestland føringar som det må takast høgde for, men hovudgrepet må, også når det gjeld tilskotsregime, slik fylkesdirektøren ser det, takst som del av arbeidet med regional plan. Regional plan skal også ta opp i seg og vise korleis kultur, idrett og inkludering kan vere med og oppfylle mål og strategiar i utviklingsplanen.

Dei fleste tilskotsordningane (33) er reine fylkeskommunale ordningar der fylkeskommunen står fritt til å opprette/nedlegge/gjere om ordninga(ne). Fylkeskommunen forvaltar også ei rekkje statlege ordningar (13), t.d. spelemidlar, midlar til verdsarv og freda bygg der ev endringar må gjerast av statlege instansar, og slike endringsprosessar vil ta lengre tid enn endringar som fylkeskommunen sjølv har fullt ut hand om. I tillegg har vi også ein del satsingar der fleire partar (t.d. både fylkeskommunen, staten, kommunar og/eller private aktørar) legg inn midlar.

Alle søkbare tilskotsordningar innan hovudutval for kultur, idrett og integrering sitt område vert lagt fram for hovudutvalet for vedtak. I tillegg gjer fylkestinget vedtak i saker om driftstilskot til større organisasjonar og institusjonar (budsjettvedtak). Om vi ser til andre sektorar i fylkeskommunen, ser vi at innan innovasjon og næringsutvikling ligg også avgjerdsmynde i tilskotssaker hos hovudutval for næring (8 ordningar). Innan plan, klima og folkehelse har fylkesutvalet vedteke retningslinjer, og delegert til fylkesrådmannen å fordele midlane (10 ordningar). Fylkesutvalet får rapport over tildelte midlar. Dette viser at det innan i fylkeskommunen er funne ulike måtar å løyse same typen saker på.

2020 var eit spesielt år med mange enkeltsaker der hovudutvalet først dels skulle samordne retningslinjer frå dei to tidlegare fylkeskommunane, dels utvikle nye ordningar/retningslinjer før sakene kom tilbake med forslag til løyvingar basert på innkomne søknader. Slik sett vil tal saker bli

mindre i 2021 og framover då tal saker med endring/justering av retningslinjer vil bli betydeleg mindre.

Mange av ordningane er små, og har små summar som skal fordelast. Som alternativ til delegering, kan fylkesdirektøren sjå at det å redusere tal ordningar kan vere ein veg å gå, slik hovudutvalet peikar på i sitt vedtak 13.02.20. Dette vil gjelde dei fylkeskommunale ordningane. Det ligg også eit potensiale, t.d. dersom det er behov for å endre/justere retningslinjer, i det å samle fleire ordningar/endringar i ei sak. Dette kan gi ein viss effekt på tal saker. Når det gjeld statlege ordningar som vi forvaltar, har vi lite handlingsrom når det gjeld fastsetjing av retningslinjer og tal ordningar. Sjølvve fordelinga på enkeltsøkjarar kan delegerast også når det gjeld dei statlege ordningane.

Fylkesdirektøren viser også til bruk og utvikling av finansutvalsmodellen. Prinsippet der er at fylkestinget fastset budsjett på løvingsnivå, og hovudutvala vedtek deltalbruken av midlane. I dette bildet utfordrar finansutvalet til at alle direkteløyvingar til organisasjonar og institusjonar vert løfta ut av sjølvve budsjettvedtaket, og gjort i hovudutvalsmøte etter at fylkestinget har fatta budsjettvedtaket. For kultur, idrett og inkludering gjeld dette meir enn 150 tilskotsmottakarar (2021), jf også oversikten som ligg ved RS 142/20. Det er signalisert at denne omlegginga skal skje i samband med budsjett 2022.

Ei av oppgåvene utvalet har, er å forme mål og gjere prioriteringar, fastsetje retningslinjer for tenestetilbod og drifta. Ut frå dette kan ein tenkje seg at delegering av mynde til fylkesdirektøren til å stå for deling av tilskot basert på dei retningslinjene utvalet har fastsett kan vere ein veg å gå. På andre sida - økonomi er gjerne det mest konkrete verkemiddelet hovudutvalet har i sitt arbeid, og sjølv med gode retningslinjer vil det kunne vere søknader som vil kunne påkalle både politiske og prinsipielle vurderingar.

3.2.3 Delegering etter særlov

Fjerde kulepunkt handlar om saker som er delegert etter særlov, Dette gjeld mynde til å fremje friluftsføremål i fylket (Lov om friluftslivet, § 22), mynde til å gje uttale i saker om freding (Lov om kulturminne § 22), mynde til å inngå avtale om felles bibliotekdrift og lånesamarbeid med ein eller fleire kommunar (Lov om folkebibliotek, § 6), og mynde til å gje uttale til tematiske forvaltingsplanar som vedkjem kulturminne og kulturmiljø (plan- og bygningslova § 19-1). Dette er saker som er formar politikk, og vil også ha sine prinsipielle sider. Dei utgjer i sum få saker i løpet av året. I 2020 hadde utvalet 4 fredingssaker etter kulturminnelova. Saker innan friluftsliv var tildelingssaker, det same gjed for biblioteksaker. Fylkesdirektøren ser på desse sakene til å vere av prinsipiell karakter; t.d. uttale om freding av eit bygg/anlegg. Uttaler til tematiske forvaltingsplanar er gjerne av dei minst «politiske» og prinsipielle sakene. Utvalet hadde ingen slike saker til handsaming i 2020. Om ein er ute etter å redusere tal saker, vil ev delegering i denne typen saker ikkje gi særleg resultat.

3.2.4 Uttale til kommunale planar

Siste kulepunktet handlar om uttale til kommunale planar. Slik dette punktet er forma; dvs skilje mellom kommunale planar heimla i plan- og bygningslov eller ikkje, er ikkje særleg føremålstenleg når det handlar om å fremje regionale interesser i kommunale planar i praksis. Eit døme på det kan vere at kommune A utarbeider ein kommunal plan for kultur og idrett etter plan- og bygningslova og sender denne på høyring, medan kommune B lagar same type plan men utan å knyte denne til plan og bygningslova. Etter gjeldande reglement kan desse to planane få ulik handsaming i fylkeskommunen. Fylkesdirektøren presiserer at vi her snakkar om fagplaner som ikkje inneheld arealdisposisjonar. For handteringa av arealsaker/reguleringsplaner er det etablert tydeleg reglement og rutiner.

Fylkesdirektøren har i 2020 prioritert å bidra med kultur, idrett og inkluderingsperspektiv inn i fylkeskommunen sine uttaler til kommunale planstrategiar og samfunnsdelen i kommuneplanar. Dette for å sikre fokus på kultur, idrett og inkludering i dei kommunale planprosessane, og som ei førebuing til arbeidet med regional plan. Innspela handlar i hovudsak om å formidle nasjonale og regionale føringar gitt i stortingsmeldingar og regionale planer. I tillegg vil vi vise til ev større samarbeidsprosjekt vi ønskjer at kommunane tek stilling til, t.d. friluftslivets ferdselsårar, vise til retningslinjer som er gitt med tanke på t.d. å kunne hente ut spelemidlar, m.m. Handtering av kommunale planer har i stor grad karakter av å formidle vedteken politikk, og gi fagleg råd- og rettleiing til kommunane innan kultur, idretts- og inkluderingsfeltet. Dette gjeld uavhengig av om planen er koplta til plan- og bygningslova eller ikkje. Det vil vere føremålstenleg at alle uttaler til kommunale planer innan hovudutvalet sitt ansvars- og oppgaveområde får same typen handsaming i fylkeskommunen.

Tidsaspektet spelar også inn, då dei fleste plansaker har ein høyringsfrist på 6 veker. Dette er ei praktisk utfordring, og så langt i perioden har vi i hovudsak måtta løyst dette ved å gje administrative uttaler som så har vorte lagt fram for utvalet som referatsak. Med tanke på dei som ber om innspel, vil det vere føremålstenleg at fylkeskommunen kan halde uttalefristen. Dette, og sakene sin karakter tilseier at her kan mynde til å gje uttale vidaredelegerast til fylkesrådmannen. Fylkesdirektøren vil følgje opp internt og få vurdert om det er trong for ytterlegare endringar for å få eins handtering av same typen saker.

3.2.5 Gjennomføring av planar innan eige ansvarsområde

Dette er ein type sak hovudutvalet har avgjerdsmynde i (NB! I regional plan ligg mynde hos fylkesutval og fylkestinget). Mål, prioriteringar og resultatvurdering er eit mogleg område der utvalet kan ta tydelegare tak. Fylkesdirektøren viser her til den nyleg igongsette prosessen med regional plan for kultur, idrett og friluftsliv, og utfordrar utvalet til, sjølv om mynde til vedtak ligg i overordna organ, å ta eit tydeleg politisk eigarskap til denne prosessen med tanke på å legge grunnlag for gode og tydelege mål og prioriteringar, og der utvalet framover kan etterspørje resultat. Hovudutvalet vil sitje i førarsetet når planen skal følgjast opp i fylkeskommunen. Dette er eit område og ei oppgåve som er prinsipiell, og ikkje eigna for delegering etter fylkesdirektøren si vurdering

3.3 Fråsegner, jf pkt 7 i reglementet:

Dette kan vere saker hovudutvalet sjølv initierer, eller det kan vere saker som kjem på høyring frå t.d. statlege organ. Her vert det gjort konkrete vurderingar i kvart enkelt høve om det skal gjevast uttale, m.a. ut frå om saka har prinsipielle og/eller viktige regionale konsekvensar. Er svaret der ja, vert det som regel laga sak og fremja forslag om politisk uttale. Gjennom denne typen saker kan fylkeskommunen vere med på å forme nasjonal politikk. Er sakene av ikkje-prinsipiell karakter, og har små eller ingen regionale konsekvensar, vert det som regel ikkje gitt uttale, ev berre ein kort administrativ uttale. Etter fylkesdirektøren si vurdering vert det alt gjort tilstrekkelege sorteringar i denne typen saker, og det vil ikkje vere aktuelt å drøfte delegering utover dette.

4. Nokre vurderingar knytt til delegering i tilskotssaker:

Det er nokre moment som er relevante å peike på i den vidare drøftinga. Det er knytt til tilhøve mellom utviklingsarbeid og drift, igongsett forvaltningsrevisjon, og tilhøve til ny regional plan for kultur, idrett og friluftsliv.

Om vi ser på tilhøve mellom utvikling og drift, kan det, om utvalet ønskjer å gå vidare med delegeringsønske, vere mogleg å tenkje seg eit tydelegare skilje mellom saker som har eit tydeleg utviklingspreg, og saker som er av meir driftsmessig karakter. Eit anna alternativ kan vere å slå saman ordningar, og/eller setje ein grense for delegering knytt til sum; t.d. at det vert delegert til fylkesrådmannen å tildele tilskot inntil ein viss sum, medan tilskot over denne summen skal til politisk avgjerd. Dette vil kunne skape ein meir uoversiktleg situasjon for både hovudutvalet og administrasjonen.

Dagens tilskotsregime er etablert for å skulle vere med og oppfylle mål og føringar i dei vedtekne regionale planane. I tillegg kjem dei statlege ordningane som vi, så langt det er mogleg, også prøver å tilpasse til dei regionale føringane. Det er eit godt prinsipp å vere føreseielege ut mot aktørane i kultur-, idretts- og inkluderingsfeltet. Det tilseier at endringar bør førebuast og varslast i god tid, slik at aktørane kan tilpasse seg desse.

Det er no også sett igong ein forvaltningsrevisjon av fylkeskommunen sitt tilskotsregime. Her vil det kunne komme fram synspunkt og tilrådingar som hovudutvalet vil måtte forhalde seg til. Dette tilseier at å gjere vesentlege endringar no, ikkje er vegen å gå.

Om hovudutvalet likevel meiner at det skal arbeidast vidare med systematisk delegering, vil dette etter fylkesdirektøren si vurdering ha 2022 som verknadstidspunkt. Då vil vi ha eitt til to år før eit nytt regime vil sjå dagens lys som konsekvens av regional plan for kultur, idrett og friluftsliv. Spørsmålet er då om dette er rett ressursbruk. Ei alternativ kan vere at fylkesdirektøren, som del av arbeidet med budsjett 2022 ser på om det kan vere nærskylde tilskotsordningar som kan slåast saman, og på den måten bidra til å redusere det store talet ordningar.

På andre sida kan hovudutvalet sjølv sagt også gjere vedtak om delegering med rask iverksetjing om dei ønskjer det.

Fylkesdirektøren si tilråding vil vere at hovudutvalet legg arbeid i å sikre ein god planprosess i arbeidet med regional plan for kultur, idrett og friluftsliv. Målet må vere å få ein god plan med tydelege mål og strategiar, eit godt handlingsprogram og gode retningslinjer for korleis fylkeskommunen for sin del gjennom bruk av dei økonomiske verkemidlane vil bidra til å følgje opp vedtekne satsingar og prioriteringar i regional plan. I slikt perspektiv vil utvalet også kunne drøfte prinsipp for bruk av dei økonomiske verkemidlane, kva type ordningar fylkeskommunen skal ha, korleis ein skal fordele ansvar og mynde mellom politisk og administrativt nivå, m.m.

5. Hovudutvalet sitt handlingsrom:

Ut frå drøftingane over meiner fylkesdirektøren at hovudutvalet sitt handlingsrom når det gjeld å vurdere ev delegering ligg innan tilskotsforvaltning og uttale til kommunale planer.

Tilskotsforvaltning:

Her har hovudutvalet fleire alternativ:

- a) Vidareføre dagens ordning
- b) Gjere vedtak om at tal tilskotsordningar, etter nærare vurdering, vert redusert/slått saman
- c) Gjere vedtak om at delegering av fullmakt inntil ein konkret tilskotssum vert vurdert
- d) Gjere vedtak om at enkeltordningar som, etter nærare vurdering kan seiast å vere av meir driftsmessig karakter, vert delegert til fylkesrådmannen å fordele.
- e) Gjere vedtak om at all tilskotsforvaltning vert vidaredelegert til fylkesrådmannen.

Uttale til kommunale planer:

Her kan hovudutvalet gjere vedtak om

- a) Vidareføre dagens ordning
- b) Vidaredelegere mynde til fylkesrådmannen å gi uttale i kommunale planer som ikkje er heimla i plan og bygningslova.

Fylkesdirektøren si vurdering og tilråding er at det ikkje vert gjort endringar når det gjeld mynde til å fordele tilskot, men at ein kan vurdere i samband med budsjettprosessen for 2022 om enkelte ordningar kan slåast saman. Når det gjeld uttale til kommunale planer, er dette eit saksområde der uttalemynde kan vidaredelegerast til fylkesrådmannen.

6. Økonomi:

Ev vidaredelegering til fylkesrådmannen vil ikkje ha direkte påverknader på økonomien. Det kan ha nokre indirekte effektar knytt til noko mindre tidsbruk, men dette vil vere minimalt knytt til at krav til forsvarleg sakshandsaming vil vere dei same. Det kan ha noko effekt på brukaropplevinga, då saker får kortare handsamingstid.

7. Klima:

Ev delegering vil ikkje ha verknader på klima.

8. Folkehelse:

Ingen effekt på folkehelse.

9. Utviklingsplan for Vestland 2020-2024 (Regional planstrategi):

Ev vidaredelegering vil ikkje ha innverknad på oppfølging av utviklingsplanen.

10. Konklusjon:

Etter fylkesdirektøren si vurdering er det innan hovudutvalet sitt delegerte avgjerdsmynde, jf «Reglement for folkevalde organ og delegering» to sakstypar som er eigna for ev vidaredelegering frå hovudutvalet til fylkesrådmannen. Det er uttale til kommunale planer og fordeling av tilskot. Fylkesdirektøren rår til at det å gje uttale til kommunale planer innan hovudutvalet sitt område kan vidaredelegerast til fylkesrådmannen. Når det gjeld tilskotsforvaltning meiner fylkesdirektøren at tidpunktet for å gjere endringar her, ikkje er det rette. Dette av omsyn til både igongsett forvaltningsrevisjon og at dagens ordningar i stor grad er knytt opp mot dei gjeldande regionale planane. Fylkesdirektøren meiner dette vil kunne endre seg når ny regional plan for kultur er vedteken, og det skal etablerast økonomiske verkemiddel for å følgje opp fylkeskommunen sin del av denne planen.